

Di con no a haco esaki prome?

UN FUTURO NOBO PA AIR ARUBA

ORANJESTAD (AAN): Air Aruba a yega na un acuerdo di principio cu KLM. Esaki ta un bon noticia pa un compania cu den ultimo añanan a pasa den basta problema pa tene cabez ariba awa. E pregunta ta di con no a busca e solucion aki mas prome.

E ROL DI GOBIERNO: Den e ultimo añanan Gobierno a critica Air ARUBA masha hopi. En particular pa e situacion financiero basta malo di e compania.

Gabinete Oduber repetidamente a acusa Air Aruba di mal maneho y a keha cu Air Aruba tabata bin fia placa cerca gobierno siendo un compania privá. Esaki a hasi cu di parti di gobierno no a sali iniciativanan pa realmente yuda Air Aruba. Mientrastanto debenan bieu a sigui aumenta sin cu tabata tin un plan di recuperacion y crecimiento pa e compania por sali for di su problemanan. E compania a hayé

den un spiral negativo y tabata bayendo malo.

E TRAHADORNAN: Pa e trahadornan e situacion di informacion negativo continuo, negligencia di Gobierno y falta di perspectiva pa sali for di e situacion, tabata causa inseguridad pa futuro. Tabata tin algun cu a cumenza busca trabao otro caminda pa segura entrada pa nan famia. E mayoria grandi di trahadornan ta hendenan hoben y cu un futuro nan dilanti. Kier men cu e gana di keda den un compania cu por bay cera no tabata tey. E inseguridad aki so caba a causa un perdida di motivacion considerable, pero completamente comprendibel. Den tur tipo di trabao e falta di motivacion ta keda refleha y ta causa daño na calidad di e trabao y na e resultadonan di e compania. Den caso di un compania cu ta bida di duna servicio directo na hende manera Air Aruba, e daño ta mas grandi ainda. Apesar di

tur esaki tin cu bisa cu e empleadonan di Air Aruba a hasi un tremendo trabao bao di e situacion insigur y difícil aki.

"AIRE FRESCO" Cu binimento di e gobierno nobo y e entusiasmo cu nan a demostra for di promé dia pa ataca y soluciona problemanan di nos pais, a trece un aire fresco cu a habri caminda pa solucionnan pa Air Aruba cu te recientemente no tabata posibel. Si gobierno anterior tabata wak companianan grandi como enemigo y menaza pa nos seguridad, e gobierno actual ta mira nan como aliadonan grandi cu kende nos mester cera acuerdonan pa beneficia nos mes caminda nos mes un forza no ta yega. "Nos mester realiza nos limitacionnan y complementanan cu forza di otro nan" un experto di gobierno a bisa. Promé Minister Henny Eman mes a bisa siman pasá cu Air Aruba no mester busca guerra pero

busca socionan pa traha cune. Y esey Air Aruba ta bay hasi awor. Promé cu KLM y despues posiblemente cu otro companianan grandi.

E FUTURO NOBO DI AIR ARUBA: E rol di Air Aruba den futuro cercano no lo ta di competi cu KLM, American Airlines, etc. E rol lo ta di complementa e rol cu e companianan grandi tin pa trece turista pa Aruba, facilita nan trabao y aumenta e eficiencia pa tur hende y compania cu kier bin y bay for di Aruba, hasi loke otro companianan no por hasi, bula caminda nan no ta bula y duna e servicio netamente Arubiano cu nos so por duna! Cuminzando cu e tareanan importante aki, di complementa companianan grandi y garantiza bon servicio y conexion cu exterior, Air Aruba por segura un operacion continuo, un situacion financiero saludable y trabao sigur pa tur su empleadonan.

ORDEN DEN CAS PA HEFENAN DI SERVICIO DI GOBIERNO

ORANJESTAD (AAN): Mientras cu tin un cantidad di Hefe di Departamento ta cana cu hopi miedo pa nan cabez no lora, tin un grupo di hefenan serio cu ta aplaudi e maneho serio y di "no-nonsense" di e gobierno di AVP/OLA. "Ta esnan cu durante di gobierno pasa a dicidi di hunga politica, di regla cos via politiek y no via reglanan di LMA y contabilidad, ta esnan cu tin miedo awor aki. Si no a hasi bo trabao bon no tin motibo di tin miedo. Si bo a evita politica den Bo departamento Bo no tin motibo di tin miedo".

Asina un hefe di departamento hoben a laga sa. E malesa den aparato do gobierno cu mester elimina ta e hungamento di politica den trabao. Tur hende tin derecho di tin nan preferencia politico. Pero no mester lague stroba Bo trabao.

E politisacion di e aparato di gobierno ta loke tin e aparato dañá. Cu politisacion kier men, e nombramento di hende den posicionnan pa motibo politico, e tumaiento di decision na tur nivel door di no-politiconan, pa motibo politico, e eliminacion, strobamento di hende, persecucion, etc. pa motibo cu Bo ta di otro creencia politico. En bez di laga politica partidista ta e base pa tuma decision, mester laga conocimiento y hechonan ta e base.

E orden den cas cu

gabinete Eman II ta haciendo obviamente a causa miedo y nos ta spera cu esey no stop nan di sanea unda mester sanea y tuma medida unda mester tuma medida. Corda e dicho Hulandes: "Zachte heelmeesters maken stinkende wonden".

DI TRI PARTIT PA TRES PAFO!!

